



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 8

Afghanistan nung provincial governor ka pokseta sūdaksü

Karim Benzema Al Ittihad nung denogo



VOL. XX NO. 235 (ADOK 235) DIMAPUR RASEMNÜ (WEDNESDAY)

AAMI (JUNE) 07 2023

₹ 5.00

Peren district nung IHC tenzükogo

Peren, June 6, 2023 (TYO): "State ka rongsenketzung renloksü atema human resource index (HRI) mesüra human capital index (HCI) tajungba akümtsüla aser iba ya health care system tajungba akümba ajanga dang atongtsü" ta Deputy Chief Minister T R Zeliang-i ashi.

Peren nung Integrated Health Campaign (IHC) tenzükba sentong nung pai iba osang metetdaksü.

Peren nung lapokba IHC ya Nagaland nung mezüngbuba lir aser tanü DC Office Conference Hall Peren nung lapok.

Linük aika nung IHC ya nübor teimba atongtsü aser mapang shitak nung tashidaktem azüoktsü aser samatsütsü atema tenzükta ta Deputy Chief Minister-i ashi.

"COVID-19 wara ajanga alima aoksadaksü aser iba ajanga takoksa bentsür aruba nungi tanü alima shia arutsü meranger. Talisa Covid ajanga Nagaland ama health care facilities maliba state asoshi khuret aika bentsür aruogo" ta TR Zeliang-isa ashi.

Covid wara ajanga linük aika health sector tsütsü tenük lapoktsüogo aser mashii mapang ka nung wara adokdang renemshia atatsü tansütsü ka agütsüogo, ta paisa shisem.

"Peren district nung IHC tenzükba ya mapang shitak lir aser iba ya Nagaland nung mezüngbuba lir. Maneni, linük nung Arunachal Pradesh kübok Namsai district sülen Peren ya tanabuba district lir" ta TR Zeliang-i metetdaksü.

Medical department-i Peren

district nung iba campaign asangsang nung inyakba atema pelar aser iba ajanga nübortem ajangzüktsü inlar ta paisa ashi.

"Ministry of H&FW-i state ajak dang IHC tenzüktsü aser district ka nung Comprehensive Health Campaign Namsai Model inyaksü tetuyuba agütsüogo" ta Health & Family Welfare Department, Commissioner & Secretary Y Kikheto Sema-i ashi.

IHC ya District Administration, Village Councils, line departments aser Medical Department yaritepa inyaksü. Iba campaign mapang H&FW-i Reproductive Child Health, TB, Hepatitis B & C, Blood Sugar, Blood Pressure, Anemia, HIV, Syphilis aser linkage to treatment facilities maparen inyaksü.

Iba mapa nung development partners- SETU, PATH, SHARE India aser AHANA ajanga yariteptsü, ta Kikheto Sema-isa metetdaksü.

Iba campaign nung main target group ji arishi küm 15 nungi 50 tsüngda alirtem asütsü. IHC ajanga Peren nung yimtsüng 49 ayimjemtsü. Athibung Block kübok 13, Jalukie Block kübok 18, Peren Block kübok 8 aser Tening Block kübok 10 asütsü, ta paisa metetdaksü.

Iba sentong nung mendenji Chief Medical Officer, Peren Dr. Limatula liasü, Kejanglwa Baptist Church Pastor Diramko-i temoatsü meshia sarasadem, Deputy Director NACO, Dr. Saiprasad-i o tatsüka jembia aser Project Director, NSACS Dr. Akuo Sorhie-i anküp tepela o jembia.

Manipur nung BSF sepai ka khaset

Imphal, June 6, 2023 (Agencies): Manipur kübok Sugnu aser Serou nung mi senoktsüba aser injang khaloktsüba lendong balala atalokba atema sepai talila mapa lemzüktsüogo.

Sugnu aser Serou nung tesüiba ghonda 48 tsüngda ozüing alema mapa inyakba, mi senoktsüba aser injang khaloktsüba sülen sepaitem mapa lemzüktsü.

Sugnu aser Serou nung Assam Rifles, BSF aser police-i mita aodang June 6 aser pongi sepaitem aser telungpurtem tsüngda khatap.

Idangji Border Security Force (BSF) ka asü aser Assam Rifles sepai ana injang agi yiru. Assam Rifles sepai anaji Army helicopter ka ajanga Mantripukhri-i anir oa anepaludar.

"Iba tatalokba nung telungpur kar asüba osang angazüker aser iba atema kulitem bushitepar" ta sangdong ka nung metetdaksü.

Külen, Manipur sorkari broadband dena internet services maneni shibangtsü tetuyuba agütsüogo.

Manipur nung June 10, 2023 tashi internet tenokdangba alitsü ta sorkari ashi.

Assam nung sangküm nungi HSLC tatidang magitsü

Guwahati, June 6, 2023 (Agencies): Assam nung sangküm nungi High School Leaving Certificate (HSLC) indang tatidang magitsü ta Assam chief minister Himanta Biswa Sarma-i metetdaksü.

Taruba academic year nungi Board of Secondary Education, Assam (SEBA)-i class 10 (HSLC) tatidang magitsü ta pai ashi, Class 10 tatidangji school level

nung agitsü ajisüka higher secondary (HS) tatidangbo akhi ama agitsü ta CM Sarma-isa ashi.

"State sorkarisa SEBA ya Assam higher secondary education council (AHSEC) den lokteptsü mapa inyakdar. Iba ya National Education Policy (NEP) den liromedema lir aser AHSEC den SEBA loktepa ajanga mapa kecha mesamatsü" ta Assam CM Sarma-isa ashi.

Kohima nung Nagaland Commissions' Complex lapokogo



June 6, 2023 nü Kohima nung Nagaland Commissions' Complex lapokba sentong nung Chief Minister Neiphiu Rio den ketdangsürtem agiba noksa angur.

Dimapur, June 6, 2023 (TYO): June 6, 2023 nü Chief Minister Neiphiu Rio-i Kohima nung Nagaland Commissions' Complex lapoktsüogo.

"Nagaland state nung Commission aika lir saka Commission ajak kanga tongtipang lir. Commission ya nübortem khurettem angadanga tenzüktsü aser nübortem taginübatem tongtsütsü asoshi lir" ta CM Rio-i ashi.

"Nübortem tsüngda yebilemstü balala atema tasüngdangbatem lir anungji Commission temi item asoshi tekaratiba nung kuli tejangja metetdaksütsü tim. Commission indang nükjidong ya nübortem tamang kadaktsütsü aser ochimashi azüoka tashishitsü melii inyaksangshitsü atema lir" ta pai ashi.

"Naga loktiliba ya tashitemet lir saka ano shisa matong lir. Public tsüngda terataba aser tasüngdangba aika lir anungji Commission temi pei lemzükba mapa nendaka inyaksüla" ta Chief Minister-isa ashi.

State sorkari Nagaland Commissions' Complex tembanga inyakba nung yariteptsü aser küm ka tsüngda

complex ajunga renemtsü ta Rio-isa ashi.

"Iba complex ano ajunga merenem saka Nagaland Information Commission indan office kanga rongdaka nüngdakba ajanga lapoker" ta Chief Information Commissioner, Nagaland, I. Meyionen Jamir-i ashi.

"Iba complex ya mezüngbo Nagaland Information Commission atema liasü saka sorkari kilem ka kübok Commission ajak ayutsü lemtet. Iba complex renemba sülen mapang lemsar Commission ka khen ka ta office amenoktsü" ta Meyionen Jamir-isa ashi.

Nagaland Information Commission nung Chief Information Commissioner ka, State Information Commissioner ana aser Secretary ka lir ta paisa shisem.

"March 2006 nungi 2022-23 tashi Nagaland Information Commission tsüngda temepishiba 304 aser ken o 11 benokogo. 2022-23 tsüngda ken o 47 benok aser iba nungi 43 tembangogo. Commission-i anendaka aliba ken o ajak tembangogo aser tang benoka aliba ken o tem asoshi dang inyakdar" ta Chief

Information Commissioner-isa metetdaksü.

"Iba ki ya December 2013 nungi tenzük aser project site ya 1.61 acres tasazük lir. Iba nungi total plan area 4,996.09 sq meters lir aser complex 65% renemogo" ta Chief Engineer, NPWD (Housing), Er. I. Tiameren-i technical report agütsüdag ashi.

Iba sentong nung mendenji State Information Commissioner, Nosazol Charles liasü, State Chaplain Rev. T. W. Yamyap Konyak-i meshiteta sarasadem aser DGP Nagaland Rupin Sharma, Home Commissioner Abhijit Sinha, Commission balala chairperson aser tanga sorkar ketdangsürtem aden.

Nagaland Commissions' Complex ya NBCC Convention Centre, Kohima kübok lir aser iba nung Disability Commission, Child Rights Protection Commission, Electricity Regulatory Commission, Nagaland Information Commission, Women Commission, Human Rights Commission, Backward Tribes Commission aser Election Commission indang office tem amenoktsü.

Nagaland nung azüshi mayoktsü nokdangba agiener

Kohima, June 6, 2023 (TYO): Nagaland government-i azü shi mayoktsü tenokdangba agütsüba sülen küm asem shi lir Gauhati High Court Kohima Bench-i iba tetuyuba agientsüogo.

"State sorkari July 4, 2020 nü azüshi ayokba, azü shibelenba aser azü ayokba noktanga indang sangdong agütsüba agientsüsa akümer" ta Hokolbarnü Kohima Bench-i metetdaksü.

State sorkari 2020 küm ak shi ayokba noktanga atema nübortem kanga ashishitepa laisü. Arrla 371(A) ajanga Naga kintemi pei pei sobaliba ozüngtem aser inyaksangshi beshitsü temeten agütsür ta nübortemi ashi.

Iba sangdong agütsüba atema nisung aikati sorkar nem tenüngsang agütsü saka ano nisung aikati ashishitep.

Constitution nung Arrla 226 kübok state sorkar anema ken o benoka liasü. Kohima nung alir nisung asem state sorkar tetuyuba anema Arrla 14, 19 & 21 kübok Fundamental Rights aser ano natural justice violation nung ajemdaker ken o benok.

Nagaland sorkari Food Safety Authority of India, Food Safety and Standards Act, 2006, and Food Safety and Standards (Food Products Standards and Food Additives) Regulation, 2011 kübok iba tetuyuba agüja liasü.

"State sorkar anema ken o benokertemi tesüiba küm aika azü aser azüshi dak sendakba maparen inyaka aru aser iba mapa inyaksü atema Kohima Municipal Council nungi permit tejangja lir" ta okatsür Iralu-i Gauhati High Court Kohima Bench dang ashi.

Naga nungeri azüshi achiba ya akhidang nungi beshia aruba sobaliba ka lir aser alemli Naga nunger putiotsütem nunga shia lir ta paisa ashi.

State sorkari azüshi ajunga noktanga atema kuli kecha mali. Sorkari Prevention of Cruelty to Animals Act, 1960 aser Indian Penal Code kübok maparen kar inyaksü akok, ta High Court-i ashi.

Nagaland Legislative Assembly ajanga azüshi ayokba aser achiba dak sendakba nung ozüing kecha magizüki sorkar indang Executive branch-i tenokdangba agüts. Anungji Cabinet lemtet ajanga iba sangdong agütsü nunga ageiner ta High Court-isa metetdaksü.

Iba ken o ya Hokolbarnü Justice Marli Vankung-i angadanga oshidang agütsüogo.

Abu Metha-i Zaputuo-u Welfare Fund semzüksü



Dimapur, Aami/June 06 (TYO): Advisor to Chief Minister and Chairman IDAN, Abu Metha-i June 6, 2023 nü Zaputuo-u Welfare Fund tenzüksü aser Kohima Orphanage and Destitute Home nem kuli kaket tem amokja liasü. Abu Metha-i ashiba agi, küm tetenzüklen Kohima Orphanage and Destitute Home Hon Jubilee amungdang pa tesemdanger tongti ka ama oa dena liasü aser iba mapang Zaputuo-u Welfare Fund tentetsü shia liasü. Iba welfare fund bank account ya Bank of Baroda nung lapok. Iba senotsü ya board kati ketdang asütsü, kong iba Home indang tetsü, Neibanuo den tejangja nisung aser social service mapa inyakba nisungtem alitsü.

Kohima Orphanage and Destitute Home nung aliba tanurtem nem maongka agütsütsü, jenjang tajung aliba careers bushiba aser wadang balala nung tematiba jenjang anguba nung yaritsü nükjidong nung iba senbong ya lapoktsü. Iba sen yagi tanurtem higher education azüngba, exposure maongka, capacity building exercises amala nung yaritsü. Iba sen yagi tanurtem pei mangdang aser tejangraba mapa inyakba nung yaritsü. Tanurtem pei mangdang aser nukla bushiba nung maongka agütsütsü nükjidong nung iba senbong ya lapok. Ajidang masü, iba sen yagi skill development, computer education, sports, music, arts, education amala nung tanurtem

tajungba kumdaktsüba nung yaritsü. Zaputuo-u nungtem nung iba senbong ya lapok, shiba Naga nung rongnung tejangja nübu ka liasü. Lai tanurtem ajunga sako amshitsü mangdang aser nukla aliba ama iba senotsü ya tajungtiba nung amshitsü. Tanü tashi aser tarutsü putu asoshi la ya nükrangdong ka alitsü. Abu Metha-i temolunger ajunga dang iba senbong asoshi tenla agütsütsü ayongzük. Iba welfare fund ya 'seed money' ama account nung sen lakh pongu inokja tenzük, ta pai ashi. Abu Metha meina Theja Meru, Chairman TaFMA aser Dr. Hovithal Sothu, PD TaFMA nungertem oa iba sentong nung aden.

Oriental College aser Royal Club Kohima-i mürekmeju sentong ayongzük



Kohima, Aami/June 06 (TYO): Oriental College Kohima indang National Service Scheme (NSS) unit aser Environmental Science

Department ajanga Royal Club Kohima den lungjemer June 5, 2023 nü mürekmejuba sentong ka ayongzük liasü. Azadi Ka Amrit Mahotsav

(AKAM) nung shilem ka ama aser World Environment Day den repa "Beat Plastic Pollution" omen kübok iba sentong ya D. Khel Kohima village nung aliba College campus nung tenzük aser Razhü Point nung tembanga liasü. Mürekmeju yimya tali temaba jenjangi ajungkettsü, nüburtem meyong ki o jen anepalitsü aser plastic ajanga libajen menentsüba anentsü nükjidong nung iba sentong ya ayongzük liasü, ta Royal Club Kohima ajanga sangdong ka nung ashi.

Lipuküm Anogo nungtem nung MMC-i achayaanga sentong ka agi



Mokokchung Municipal Council-i ayongzük Alima Lipuküm Anogo sentong akaba mapang sempet agizükertem DFO Mkg. Dr.Sentitula IFS,ADC Mkg. Chumlamu Humtsoe nungertem tangokba noksa.

Mokokchung,Aami/June 6 (TYO): June 5 nü Alima Lipuküm Anogo(World Environment Day) sentong aser 'MeriLife,Mera Swachh Shehar' tembangba sentong Mokokchung Municipal Council(MMC) conference hall nung kanga dang acha ket keta agiogo. Iba sentong nung Alima Lipuküm Anogo nungtem o District Forest Officer Mokokchung Dr.Sentitula IFS

ajanga lemsatop aser Additional Deputy Commissioner & Administrator MMC Wb.Chumlamu Humtsoe ketdangsuba nung agia liasü. Sentong nung All Ward Union Mokokchung Chairman Wb.Limanungsang,Kabur telok nungi aser Clean Mokokchung telok nungia shilem agia jembia liasü. Mokokchung town ward-tem nung MeriLife, Mera

Swachh Shehar sentong kübok Reuse, Reduce, Recycle mapatong inyaka aruba nung tajungtiba asem(3) shimteta agütsüba nung 1st -Salangtem Ward, 2nd-Süngkomen Ward aser 3rd- Arkong Ward ta adok aser iba mapatong nung alia yariteper Zila Sainik Board Mkg.,Kabur telok aser Clean Mokokchung telok nema tepelaba tamaitü certificate agüja liasü.

CMHSS Impur nung Lipuküm Anogo sentong agia amung

Mokokchung,Aami/June 6 (TYO): Alima ajunga den külemi Clark Memorial Higher Secondary School(CMHSS) Impur nunga hombarnü Alima Lipuküm Anogo(World Environment Day) sentong " Solution to Plastic pollution" ta asüba omen nung ajemdaker kaogo. Sentong omen nung ajemdaker tanurtem house balala lemsar tetoktepa agi aser school ki temeket nung titi tetong 40 temokja liasü.



Clark Memorial Higher Secondary School(CMHSS) Impur, Principal Wt. Chubainla-i titi tong atemba noksa nung angur.

ATMA Kubolong Block ajanga sentong balala ayongzük



Dimapur, Aami/June 06 (TYO): Azüngken (Soyabean) lu ayimba nung aluyimer nem scientific aser yimya tajungba sayua timba aser tajungba züsentetdaksütsü nükjidong nung Agriculture Technology Management Agency (ATMA) Kubolong Block ajanga Mokokchung district kübok Mopungchuket yimdak June 5, 2023 nü azüngken lu ayimba yimya balala sayua liasü.

Block Technology Manager, ATMA ajanga ashiba agi, nüburtem dangar dak memetaloki alitsü tangatetba tali temaba jenjangi ajungkettsü aser resources tajungtiba nung shisa kaa amshitsü asoshi Mission Life ya tenzük. Iba nungya energy aser tzi kumzükä ayuba, jenjang-menjang (millet) ajungketba densema lir. Iba onük nung ajemdaker shisalen sayur Tsuktirenla S. Jamir-i jenjang-menjang koda tongtipang, itemji rasaa ashi aser nutritional content tali aliba ajanga jenjang-menjang ya 'Nutri Cereals' ta züngshir, ta ashi.

Iba sentong nung shisalen sayur C. Amongla Jamir BTM, ATMA ajanga ashiba agi, azüngken ya 'legume crop' ka lir aser atmospheric nitrogen keta aliba ajanga ali temu kumdaktsür aser proteins aser fats timba aser tajungba aliba chiyongtsü ka lir, koba jenjang talang aser mela-mela angur.

Jenjang-menjang ya 'climate smart crop' ka lir aser temang nung teyari balala agütsür aser tenem-lenden mashi nung züsenteter aser iba chiyongtsü aintsü atema tzi mesüra ali temu kangabo menüngdaker, ta lai ashi.

Lai azüngket tsünütsü asoshi tzi-mopung aser ali temu indang tejangja rasaa ashi aser aluyimer dang line sowing, ali tajemba agia aser intercropping yimyatam amshia azüngken timba adokdaksütsü aluyimertem ajungshia liasü. Maneni lai azüngket aongba, line sowing method amala sayua liasü.

Jenjang-menjang tsünüba ya aluyimer asoshi rongsenren nung tajangzük kanga lir aser jenjang-menjang metsü ya mapang talanglang riziunga yuteter, ta shisalen sayuri ashi. Iba sentong nung jenjang-menjang tabu balala aser iba indang value added products tem indanga jembia liasü.

Sentong tatemi aluyimer nem azüngken metsü aser gardening gloves tem lema agütsü. Iba sentong nung aluyimer 10 dena liasü. Maneni Agricultural Technology Management, Kubolong Block ajanga kasa anogo Longpa yimdak "Mission Life" indang awareness agütsütsü mechi "Promotion Of Millets" nung training sentong ka ayongzük liasü. Mission Life indang nükjidong rateta jembiba mapang C. Amongla Jamir,

tem indanga jembia liasü. Lai jenjang-menjang poktetba, tabu balala, tzi-mopung aser ali nungdakba, tsünütsü yimya, seed rate, intercultural operation, cropping system, harvesting & post-harvesting management indanga tejangja shia liasü. Maneni aluyimer dang jenjang-menjang tali adokdaksütsü aser tali achitsü ajungshia liasü. Iba sentong nung aluyimer 22 dena liasü.

Odisha train lendong: Mamata-i yirur alirtem den ajurutep



West Bengal Chief Minister Mamata Banerjee-i train tsükokba lendong nung yirur alirtem Cuttack nung semdangba mapang mozüki ka nung medic tem den sensak asemba noksa nung angur.

New Delhi, Aami/June 6 (Agencies): West Bengal Chief Minister Mamata Banerjee-i Mongolbarnü Coromandel Express tsükokba lendong nung yirur alirtem den Cuttack nung ajurutepa liasü.

Lai, SCB Medical College and Hospital, eye & surgery department semdanga yirur alirtem den sensak asem aser parnok nem takokba tashi teyari agütsüsü nangzuka liasü.

"Onoki takok tashi yirur aliba passenger tem nem teyari agütsüsü merangdar aser June 2 aonung train tsüktepba sülen yirur alirtem nem teyari agütsüsü atema doctor, nurse aser ketdangsürtem yokogo," ta lai osangbenertem dang ashi.

Banerjee-i ashiba agi, West

Bengal nungi yirur aliba passenger 57, tang SCB Medical College nung temang anepaludar.

"Parnok rongnung karbo tetsüing teben aser tenük raksaogo. Iba ya lendong kanga tulu ka aser tebang agi rasa ashitsü makoker," ta lai osangbenertem dang ashi.

Bengal Chief Minister-isa, West Bengal nungi iba lendong nung asür parnok 103 jangjaogo ajsüaka tang tashi nisung 30 monguteti lir, ta ashi.

"Ni asür kinungertem nem teyari sen lakh 5 aser kanga mejungi yirur alirtem nem sen lakh 1 agütsüsü nangzükogo. Iba train nung nisung 900 shi senzua liasü aser parnok ajak kanga aoksateper lir anungji

parnok nisung shia nem sen 10,000 agütsüsü," ta laisa shisem.

Banerjee-i, train tsüktepba indang osang tejangja lai metetner ta ashi.

Banerjee den külemi Women and Child Development minister Shashi Panja aser Finance Minister Chandrima Bhattacharjee natia mozük balala semdanga liasü.

Minister anapronglai AIMS Bhubaneswar nung temang anepalua aliba passenger tem semdangogo.

Kasa mapang nung West Bengal Angh CV Ananda Bose-i, South 24-Parganas kübok Basanti tesem semdanga traing tsüktepba lendong nung asür kinungertem den ajurutepogo.

Sikh nunger temeshi ainer aoer 215 nem visas agütsüogo: Pakistan HC

New Delhi, Aami/June 6 (Agencies): Guru Arjan Dev asüba anogo atongtsü anogo ka lia benjung amungba nung shilem agütsü atema India nungi Sikh nunger temeshi ainer aoer 215 nem Pakistan-i visa agütsüogo.

Pakistan semdangba mapang temeshi ainer aoertem temeshi tesemtem aika semdangtsü kong Gurdwara Panja Sahib, Gurdwara Nankana Sahib aser Gurdwara Kartarpur Sahib densema lir. Parnok June 8 nungi 17 tashi amungtsü aliba benjung nung shilem agütsü.

"Visa agütsüba ya Visits to Religious Shrines of 1974 dak sendakba nung Bilateral Protocol benoka inyaksü asoshi

Pakistan sorkar bendanga agütsür aliba nung shilem ka lir. Küm shia India nunger tekülemer aikati Pakistan semdanga tamangba yimsü dak sendakba benjung aser sentong balala nung shilem agir," ta Pakistan high commission-i Mongolbarnü sangdong ka ajanga metetdaksü.

Pakistan indang chargé d'affaires Salman Sharif-i, temeshi ainer aoertem temaotsü akaba mapang ka asütsü asoshi imlaja ataba lemsatepogo. Pai ashiba agi, Pakistan-i maneni temeshi tesemtem wazüka ayutsü aser tesemdangertem nem nungdakba teyari agütsüsü asoshi bendanga agütsür lir.

Küm shia India nungi Sikh aser Hindu nunger temeshi aineri aoertem aikati Pakistan semdanga benjung aser sentong balala nung shilem agir. India nunger Hindu nungertem nem parnok kinungertem aser medemertem semdangtsü asoshi Pakistan semdangtsü atema Pakistani mission-i visa agüja arudar.

India-ia, Ajmer nung Sufi saint Khwaja Moinuddin Chishti indang dargah aser New Delhi nung Sufi saint Khwaja Nizamuddin Auliya indang mausoleum densema shrines balala semdangtsü atema Pakistan nungertem nem visa agüja arudar.



Tir Droupadi Murmu nem Surinam indang civilian award tematiba 'Grand order of the chain of the yellow star' Suriname tir Chan Santokhi-i agütsüba noksa nung angur.

Haryana nung aluyimertemi longkak ait

New Delhi, Aami/June 6 (Agencies): Minimum Support Price (MSP) nung sunflower tejang alizüktsü khanga Mongolbarnü aluyimer noklang aikati Haryana kübok Kurukshetra nung National Highway-44 nokdanga ayu.

Aluyimertemi lenmang nokdanga ayuba sülen police tem iba tesemi oa gari senzusenpong aziüoka liasü. Iba longkak aitba sentong ya Haryana BKU (Chaduni) tekolakba Gurnam Singh Chaduni lenisüba nung agia liasü.

Aluyimertemi state sorkar dang parnoki sunflower tejang MSP nung malizüktsü aser iba tejang ya Bhavantar Bharpai Yojana küboki yoktsü atema telemteba agiba meyipa agütsü khanga liasü.

Longkak aitba tesem nung o jembiba mapang Chaduni-i ashiba agi, sorkari quintal nung MSP sen 6,400 agi iba tejang alizükba inyakyim tangsa tang tenzüktsü asoshi khanga liasü.

"Sorkar ketdangsürtem den senden amenba mapang onoki iba tejang tsünürtemi MSP dang nungi tajemba kecha magizüktsü ta jangja jangja

shiogo. Sunflower tejang ya sorkar indang Bhavantar Bharpai Yojana kübok malizüktsü ta tenangzükba agütsür," ta pai osangbenertem dang ashi.

Sorkari iba tejang Bhavantar Bharpai Yojana küboki yoktsü atema telemteba agiba atema mepelai sunflower alu ayimertemi taoba mapang sorkar nem June 6 nü tashi nung parnok telemteba agütsü asoshi takhangba ka agüja liasü.

Taoba mapang Chaduni-i anir aluyimer lenirtemi state education minister Kanwar Pal in Chandigarh den ajurutep shiba parnok takhangbatem Chief Minister nem metetdaksütsü ta tenangzükba agüja liasü.

BJP-i aniba sorkari sunflower tejang ya MSP nung malizüktsü atema telemteba agi aser iba melena Bhavantar Bharpai Yojana kübok quintal nung sen 1000 agi alizüktsü telemteba agia liasü.

Aluyimertemi ashiba agi parnoki quintal nung nung sen 4000 agi yokdar koba MSP bo 6,400 lir.

Construction firm-i chireper aliba Bihar apu yanglushitsü: Dy. CM



New Delhi, Aami/June 6 (Agencies): Ganga ayong nung tang sen crore 1,710 intoka yanglua aliba Agvani-Sultanganj four-lane apu ya construction company, SP Singla-i parnok sen intoka yanglushitsü, ta Bihar indang deputy chief minister aser road construction minister Tejashwi Yadav-i Mongolbarnü metetdaksü.

Patna nung osangbenertem den sensaksemba mapang yadav-i, "Ni opposition lenir asüba mapang iba ken o ashishio. Indian Institute of Technology, Roorkee-i report agütsüba sülen ni iba apu jenjang dak sendakba nung temulung melemi liasü. Iba apu ya yanglushitsü. Contractor-i apu yangluba sen intoktsü. November aser December ita asadanga sülen mapa anentsü atema tetuyuba tejangja agütsüogo," ta ashi.

Bharatiya Janata Party's (BJP)-i Central Bureau of Investigation (CBI) nem iba ken o bushisüngdangdaksütsü atema akhangba indang ashishiba mapang yadav-i, "opposition-i ashiba dak sendakba nung onok kecha sendaka mali. Bushisüngdangba sülen ajak jangja akümtsü.CBI

ketdangsürtemi ya engineer tem asü?" ta ashi.

Kasa mapang nung Chief Minister indang Office (CMO) ajanga Bihar Pul Nirman Nigam (BPNL) MD Naveen Saxena dang anogo 15 tsüingda telangzuba agütsüsü asoshi tetuyuba agütsüogo. Sorkarisa BPNL nungi engineer ka mapa nungi anentsüogo.

Khagaria nung MLA Dr Sanjeev Kumar-i, ken o nung sorkar ketdangsürtem aser construction firm sendaktepa alitsü ta temulung melemi bilemba lemsatepba den road construction additional chief secretary Pratyaya Amrit kong nokdaka ali iba indang ashishia liasü.

Apu chirepba dak sendakba nung Hombarü Patna High Court nung Public Interest Litigation (PIL) ka benoka, ken o dak sendakba nung department-i masü saka jurila bushisüngdanga ka asoshi khangogo. Maneni SP Singla Company ya blacklist sütsüsü takhangba lir. Takhangba nungsa sen crore aika intokba indang shisema lir aser SP Singla densema ken o dak sendaka alirtem nem senotsü intokba menokdaksütsü takhangba agütsüogo.



TIR YIMYIM YIMOBILEM (EDITORIAL)

DIMAPUR RASEMNÜ, AAMI (JUNE) 07, 2023

Govt saksalemdaktsüba mapa

Naga nungertem ajak ya lokti meimba nübertem lir. Iba jagi shiba kong lidir liang , pei yimtsüng aser pei lima mamar aser pei nübertem asoshi mapa tajung inyaker. Aji oda, Naga nungertemi Nagaland ya tangar nema topur junga ngudaktsüner, anungji tesem tesem nung National aser State Highway dena temulunger tenla bendena yanglushiba asenoki aiben angur. Kasa tangatetba nung taküm küma-a yakanü alima lipuküm anogomung nung Dimapur nung Dimapur Ao Lanur Telongjem (DALT)-ia sündonglidong atemba den Tajen Road nung lenmang majungba yanglushitsüba aser yimti yimdong nung street light dena enoktsüyonga aoba osang angashiogo. Senso kati pei lima aser pei yimti meima inyakba mapa tajungtem rongnung ibaji ka asütsü. Iba ama pei lima aser pei yimti topur jungdaktsünüba agi Kohima aser Mokokchung nunga mapang mapang shia nübertemi tenla agüja, shitakba agi government-i inyaktsüba mapatem inyaka angur. Atangji, Tajen Road ta ajaba lenmang ya National Highway lir, ajisüaka kasa lenmang ya Assam len nungi arudang lenmang tajung aser tesadem nung ayongayonga arur ajungbena ka dang Nagaland gate adena aيتدang ayongküm nung jajar amai akümer. Aji kechiba (?) ta asüngdangra, tanur tila kati Nagaland asüba agia ta jet ta langzötsü. Kasa lenmang saka Nagaland nungbo majung aser Assam nungbo tajung ta asüba tetezüji, Assam nung government-i nübertem akhümtsübur saka Nagaland nungbo government-i nübertem kecha hau ta mali ta asüba kuli ka sayur. Aji oda, Assam nungbo nübertem tsüngdang government maparen tilakata miimbanga meyteter saka Nagaland nungbo government-i nübertem atema inyakba mapatem memiimbangtetba mapa kecha maka. Aji oda, pibo tajung kaji nübertemi government department balala nung terenlok mapatem inyakba sentongtem timtem aser nungsen agia mita repranger, iba jagi teinyakertemia kümdanga inyaker. Ajisüaka, Nagaland nungbo nübertemi government-i inyakba mapatem indang kecha metetnüa mali, anungji kecha asüngdangbolua mebushir. Iba jagi mapa inyaktsütsü purtemia nübertem akhümtsübua mali odang toktsür. Nagaland nungbo lenmang majungyonga nübertemi tarem, light maliyonga ojang aser government nungi tangutsü ka manguyonga kecha masü saka mapa meinyak ser agizüka magirtemang takoksa asütsü. Anungji, Nagaland topur jungdaktsüdi süra tamasa nübertem ya pei lima mitkartem akümtsüla aser pei lima nung pei government-i inyakba aser meinyakba mapatem indang metettsüla. Aji oda, government-i inyaktsüba mapa ka nung senbo agizüka agi saka mapabo meinyak ta ser toktsüba mapatem anema nübertemi ola adoktsü melen ajemajema itemji temulunger tenlatem agi inyakra, iba jagibo alima tajungba akümtsü melen tamajungba dang akümtsü. Atangji, majung reprangtetyonga teti tai pua anidaktsübajia talaktsüka, anungji tai aputsü melen tang mulungtet teloktemi inyakba amaji government-i inyaktsüba mapatem asüyonga pei teinyaktsü shilema lir ta angateta inyaktsübajia kanga tenüngdaktsü. Iba jagi government nung alirtema saksalemdaktsür aser nübertema government-i inyaktsüba mapatem mita reprangtsü asoshi tashi aser temeten tuluba angur. Atangji, nübertem asoshi terenlok mapa inyaktsütsübaji government shilem lir, ajisüaka mapa ajak government nem shiloka toktsür sensosangertembo temeyonga meküraktsü ta masü. Government-i lenmang yanglutsüyonga, aji junga yanglua ayutsübaji nübertem dak aket. Aji oda, yimti ka meraketa ayutsü atema gari lenmang dang masü saka tetsüng agi jajaba lenmang nungi shir yimdong asoshi tesangwa dang masü saka topur jungdaktsütsü atema street light enokba mapa tashiji nübertem dak pei lima meimba aser government-i inyakba mapatem metetnüba shisatsü ali nung dang shitak inyaka yutettsü. Item ajakji government o nübertem na tsüngda temulung lemtep aser akümtsübutep aliba ajanga ataloktsü.

OLEMSABANG

AOR MOATSÜ

~ P. Renthly Jamir

Aor moatsü benjong indang Tir Yimyim adok yimobilem 4th May 2023 nung züluba aser kasa osang kaket nung Temsü Jamiri ocet züluba ana den medemdanga ni ajangshiba aser angazükba tatsüka zülur. Aor moatsü indang teimbai tanü putu tensa nung rangloker zülur. Ano aikati talitapong puraloka zülur. Pai mangu nung tangari ashiba yazü agi ochi kümer zülur. Ni moatsü nung dena aruba tenük kuli aser angazükba kar yangi zülur. Asen Aor otsüren angadagra kari onok longtrok nung malia ta ashir karibo onok Chungliyimti majang arua ta ashir ano onokbo indang indanga koridang nungi oa aküma ta ashir telok ka, ni tama ozü tama ta asür. Asenok ya yimshia sasong atsü waya agi yim atsüdanger settu tur aso angena yur litepa aru. Ano yimmakba ya moatsü yatinep teimba maka aru. Anungji tanü ama Aor ajak sangzüker moatsü munga maru. Saka alu pen aser luti tenmaba mapang apir alu nung metsü remli amung. Yim shia anogo balala pei yimer mapa atem apir amung.

Langpangkong nung yim teimba pen February nung atener luti March nung atener. Anungji luti tenmar April tetenzük nung moatsür. J.P.Mills THE AO NAGAS kaket nung immediately after sowing is finished ta zülua lir. Aser pai Dr.Clarki ashibaji tai ta shia lir. Aser aji shitak pai ashiba Dr.Clarkibo moatsü ta asübaji mo-young rice-atsü-divide alu nung mo asoseper (mo lanu) Taküm Dimapur kiyong kar nung moatsürtema mo lanu asüdang moatsür ta jembiba angu. Onoki küm aika moatsü nung dena aruogo saka mo asoseper kodanga mamung anungji J. P. Mills-i ashiba ama Dr.Clarki mo asoseper ta zülua lira aji tai. Mills kaket nungbo tai kuliji yim tenüng dena agüja zülua lir. Langpangkong ayonglanglen aser Ongpangkong ayongbanglen metsü mongpu tera memedem. Anungji Aor school azünger ajak sodi külem agitsü atema May 1st week nung moatsü amunger. Iba tanu putu yimya apir amungba. Tang Tir Yimyim onük moatsüdang kibong asüngtetba onük dangi arudi. Moatsü ya shi aser yi benjong tulutiba asünung kibong asüngteta ayubabo kangarabo bulua mejembir. Saka J.P. Mills-ibo nisung ajaki mezüngbuba benjong aonungjibo kibong asüngteta ayur saka tanga aonungtem nungjibo kecha ashibang mali. Everywhere intercourse is forbidden on the first night of the festival but is usual on the other nights. Ano paisa yamai zülua lir. Yim ka nungbo mepu shia asangurtemi aonung tangar mepu nung oa yi anganüdaktsütsü tasür aiürtem pua bener arur saka aiben shitakba nungbo aji mapa tajung bilema masü. The young bucks of each khel go in drag off girls from other khel in the evening normally to give them drunks but often in reality for less innocent purpose. Tebur ajak ki maka yi jemtepa ken tena sangwadaktsütsü kinungtsürtem ki mashi ayiptsü . Yim ka nungbo takar tazünpur kati aonung tesü pa sobusolemtsü bener jamija ka kidangi yok. Takar sobutsü shikhuyi Wai, Temko, Tongtizük, Marzük, Shipo, Benbang ka amena. Alemli kidang milen maka tammang shirar memetet. Aji krang , krang, ta oa yutsür tebuttsü dak mapa tamajung inyaker aruba moatsü otsü jembir. Aser Aor moatsü dang ken O tai temeten kecha bushia maor. Akhi mapang asünungbo aji kilamet senchi tulu achitsü.

Akhi mapang moatsü ya Langpangkong nung takangba telongsoba munga aru. Changtongya ,Akhoya nung anasa aliba Phom nung yim ajak moatsü anja ajar. Ano Chuchuyimlanglenbo Phom nung dang masü Chang nung dena ajar. Aji dang masü küm tsüngda tembar alir tasürtem ajak pei tembar kwi ali mangphai adoktsü. Item tarur ajak atemaji senpet lep aleptsütsü shi lep agütsütsü chitem aontem temtsütsü, ya tsükla mapang tzüla tzü aremdang asünung tembar ajak medema kisünga anener. Yimdak takarbo ishikadang sensakerbo aika aser tembarji takar sensaker kasa lir. Anungji atangashi kümba sensaker atema moatsüji tebilemtsü khuret liasü. Kechiyong iba putuji tanü ama sensaker O takar me. Bendang aliba mapang masü liasü. Sensaker asüyonga temba longener atema jangotsü shi teperi alioka ayutsüla, piya Lungpo kabo saa ayutsüla . Arju nung ak apuba sentsüh nung adentsü moatsü lenpi aontem tsük yimchi ka agibosa alitsü ano kidang tanurtema abensüoshi kakabo tasen sobutsüla kechiyong moatsüdangbo süoshi tajungba sobur.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

N. Theyo Foundation for Theological Education mungogo



Kohima, Aami/June 06 (TYO): N. Theyo Foundation for Theological Education ajanga sponsor asüba sentong mezüngbuba June 6, 2023 nü Hotel Pine Conference Hall, Kohima nung agia liasü.

N. Theyo Foundation for Theological Education ya küm asem degree course (Bachelor of Theology/ Bachelor of Divinity and Master of Divinity) atema lir.

Taküm asoshi iba teyari ya nisung ana Sekhono Kezo (Bachelor of Divinity atema) aser Rupfusato Theyo (Master of Divinity atema) agütsür, koba instalment asem nung agütsütsü aser nisung shia sen lakh 1.50 agütsütsü.

Iba Foundation indang

mendenpuba Dr. Keveduyi Theyo-i ashiba agi, iba Sponsorship Programme ya par tsürabur indang mangdang ka liasü, kong Theyizumi (Baptist) nungi theology azünger parnoki bendenba nungi yaritsü bilema liasü.

Pai candidate ana dang meranga azüngtsü, Laishiba indang shisatsü angazüka Tanüla Temeshi nung Tsüngrem o nüburtem den lemsatepba nung akang-akang nokdaksü ayongzük.

Iba sentong nung Theyizumi Baptist Church senior pastor Thepuzhoyi Theyo ajanga Tsüngrem temoatsü jazüka sarasadem aser tepela o jembia aser N. Theyo aser pa

kinungtsü indang takum otsü tongmelang agi lemsatep. N. Theyo aser pa kinungtsü ya süogo saka parnoki mapa tajung inyakba ajanga parnok takum lir, ta ashi.

Sentong nung Mezivolu T. Therieh menden liasü aser iba Foundation indang omen "Fulfilling God's Plan" aser maitsü (logo) Acorn (Oak Tree) koba tebui meimba süngdong ka liasü, ta lai ashi.

N. Theyo ya Phek district kübok Theyizumi yimtsü nungi Khristan yimsü mezüngbuba agizüksang lir. Pa ya taoba mapang Nagaland sorkar nung cabinet minister inyaka liasü aser August 29, 2019 nung asü.

Nigeria nung shiruru metsürtemi tamanger aika tepset

Abuja, Aami/June 06 (Agencies): Nigeria tiyonglen Benue state nung taoba ita Roman Catholic tesayur ka aser pa kinungtsü densema Khristanpur aika tepset, ta ketdangsür kati ashi.

Fulani shiruru metsürtemi Khristanpur tepsetba mapang May 8 nü Hirnyam village, Guma County nung aliba St. Peter Catholic Church nung Dominic Dajo aser pa kinungtsüa tepset, ta Guma Local Government Council züngsem Christopher Waku-i ashi.

Kasa anogo shiruru metsürtemi Guma county kübok Tse Vambe, Tse Ortim aser Torough Mbanyar yimtsüngtem amak. Iba sülen hopta ana nung parnoki kasa county kübok Agasha, Gbajimba, Mbawa, Iyer, Tse Iortim, Yogbo, Nyiev, Yelwata, Ukohol, Ortese, Hirnyam, Uvir, Nzorov, Mbawa, Mbadwem, Mbabai aser Semaka yimtsüngtem amak.

"May 24 nü Fulani shiruru metsürtemi item tesemtem amakdang Khristanpur aika tepset, yimtsüng ajunga raksatsü aser ano tamanger meyerijang aika tesem balala nung jenshia lir," ta Waku-i Morning Star News dang text message ka ajanga ashi.

Fulani shiruru metsürtemi May 11 nü Mbawa densema

yimtsüng ishika amak aser iba mapang Khristanpur 28 tepset, ta Waku-i ashi.

"May 9 nüa parnoki Muslim kiralongrar den lungjemer item yimtsüngtem kar amakdang Khristanpur 22 tepset," ta pai ashi.

Asürtem ya timba tetsür aser tanurtem lir, ta yangji alisangi ashi.

Tamangba yimsü mechi Nigeria nung 2022 küm Khristanpur 5,014 tepseta liasü, ta Open Doors USA indang 2023 World Watch List nung shia lir.

Ajidang masü alima nung Khristanpur pua bener aoba (4,726), tashiyim amshia shi nung medemba, merenshiba, tashiyim agi kibong akumba mesüra züka merenshi anunga Nigeria ya tematiba jenjang nung lir, aser tamangba yimsü nung ajemdaker ki o jen aser shishilempaba tesemtem raksatsüba nung temaba nung lir. 2022 küm tekülemki amakba aser nüburtem tesem balala nung prokshiba tsütsüa Nigeria jenjang tanabuba nung lir.

2023 World Watch List nunga alima nung Khristanpur alitsü asoshi tamajungtiba linüktem rongnung Nigeria ya jenjang trok buba nung lir, koba 2022 küm jenjang tenet buba nung liasü.

"Fulani, Boko Haram, Islamic State West Africa

Province (ISWAP) aser danga teloktem nungi telungpuri Khristanpur aliba tesem amaker, tepseter, yirutsür, tashiyim amshia shi nung medemer, senotsü meshitsü mesüra alar ama ayutsü mechi pua bener aor," ta World Watch List ajanga ashi.

"Taküma Khristanpur timba aliba linük south tsütsü azüdokshi kanga bolua angur... Nigeria sorkari tamangba yimsü nung ajemdaker reshikangshiba magizüker, anungji Khristanpur temeden anema inyakba memerenshi yutsür."

Nigeria aser Sahel region nung Muslim Fulani nungner ya million aika lir aser parnok ya tezü balala nungi jakzükba kin noklang dak tema lir aser parnok rongnung kin kari radical Islamist ideology sülen anidaker, ta United Kingdom indang All-Party Parliamentary Group for International Freedom or Belief (APPG) ajanga tawa sangdong ka nung ashi.

"Parnoki Boko Haram aser ISWAP yimya amshir aser Khristanpur dak tenük yokba tejangja sayur," ta APPG osang ajanga ashi.

Nigeria indang Middle Belt nung Khristanpur dak timtem agütsüba ya parnoki Khristanpur meyong ali tashiyim amshia rakzüka Islam yimsü benoktsü meranger, ta Nigeria nung Khristan lenirtemi ashir.

ANOGO ABEN TSÜNGREM DEN

Tagütsür Bilemtetang (T.Ken 107:32-33)

Khristantemi mapang tajung nung dang jangratema alitsü bilembaji lendong tulu lir. Kodang asenoki Tsüngrem dak masü mapang tajung nung dang metaloker aliba Tsüngremi angur Pai mapangji melenshitsür. "Pai ayongtem litem li kümdaktsür, aser tzü ayongtem tzüraba li kümdaktsür, temo aliba li metsü li kümdaktsür, kechiyong yangji shiba ali, parnok tamajung mapa yong lir. Pai arem agi tzü nung azü kümdaktsü, aser ali takong agi tzü ayong kümdaktsür. Aser yangji yaseta alir Pai lidaktsür, angji parnoki talitsü yimti yanglu" (t.33-36).

"Asenok item tesüngmangtsü ayongtem aser ayongnu kar. Asenok item süngjang atangba litem kar. Asenoki chidi, jemdi aser pelaa lidi" ta nai ashitsü akok. Saka Tsüngremi ashir, "Minute ka ataang. Nenoki sempettemji pela agir aser tagütsüsang amadoker asü? Nenoki kü teka repranger aser kü mulungjang amadoker asü? Nenoki kü rongsen nung pelar saka Ni mulungba sentoker asü?"

Yamaji teti ataloker- asenoki süngyanglu dangi meyiper. Asenoki temelentep nung alitsü tenzüker. Ayongtem aser ayongnutem aser süngjang atangba li asenok Tsüngrem kümdaktsür. Pai ayongnu tzütemji shibanger. Pai ali temo alibaji litem li kümdaktsür. Idangji asenoki ayimtener, " O Tsüngrem, onoki kechi inyaktsü?" Pa telangzübaji, "Nenok temoatsütem külemba dang nungi Ni külemtsü tenzüker. Temoatsü nung masü temoatsür dak reprangtsü tenzüker. Süngyanglu tekülem. Ne nem tajung ajak agütsüba asoshi Kü tenüng sangang." Shisa kaa liang. "Shir shisa aka, item mapa nung temulung agütsüdakjang, aser parnoki Kibuba yimlibilem indang shisadangtsü" (t.43).

Na alima nung metaloker lidaktsütsü satani pa tajungtiba agi inyaktsü. Kodang pai takok ngudir, nai Tsüngrem amadoktsü aser ne rongsen dak temulung alemtsü. Nai jangratema bilemtsü akok. Item asoshi Tsüngrem tenüng sangang; saka maneni ne tanelaren tashi Tsüngrem nungi agiang. Tsüngrem temoatsü ayongtem ne nem agütsüba shibangadokra, Pa külemtsü tenzüker.

Khristanpuri tsüboba Amit Shah den lemsatep

Kochi, Aami/June 06 (Agencies): Catholic Bishops Conference of India (CBCI) ajanga Hombarnü sangdong ka nung CBCI tir Archbishop Andrews Thazhath aser Union Home Minister Amit Shah nung Deobarnü Kochi nung senden amenba indang shia liasü.

"India tesem kar nung Khristanpuri timtem aser tayongzükba ajuruba aser tetsüba aliba indang archbishop-i lemsatepa liasü. Iba mapang Manipur nung tamanger temi lendong timtem ajuruba indanga nenshia ashi," ta sangdong ajanga ashi.

Archbishop Andrews Thazhath-i jembidang Home minister-i züngzünga angaa liasü aser senden ya kanga junga amen, ta ashi.

"Home minister-i Manipur

aser North East nung pa indang mangdang lemsatepa liasü aser kanga pela agizük. Archbishop-i tatalokba kar, talisa Madhya Pradesh tesem kar nung atalokba indang ashidang, Amit Shah-i iba tatalokba reprangtsü aser Khristanpur aser nüburtem ajungtsü asoshi nungdakba maparen inyaktsü ashi," ta sangdong ajanga ashi.

Linük yangerba, talisa shisaliok, health care aser social service nung Khristanpuri shilem agiba indanga jembia liasü, ta ashi.

"Khristanpur meyong reju kari tawa timtem ajuruba indang home minister den lemsatepa liasü. Paia item timtem angatetepa tajungba dangi bener arutsü asoshi akok tashi inyaktsü langzü. Iba senden ya minute 30 shi mena liasü," ta CBCI sangdong ajanga ashi.

AO OSHI ANGAZÜKDAK:
TANÜ ANGAZÜKTSÜBA OJANG



Ranglok

(v) repring (look at)

* Yisui kangki nungi Peter dak **ranglok**.

Rangma

(v) tarangtsü agi ana aküm (saw into two)

* Yosefi süng talang ka ana kuma **rangma**.

OLONG PAITEP # 6538

1						2				3
								4		
5		6				7				
8										9
								10		
				11		12				
		13								
14						15				
				16						

TIPIEN

- 1. O jembitsü tashi -8
- 5. Süngjang tapu ka -5
- 7. Tekanük nung enokba -5
- 8. Teka amtep -5
- 12. Tzüc asendak -5
- 14. Tsünpang tema aliba -5
- 15. Ken atenba yimya -5
- 16. Asangur -8

LANGTSÜNGLEN

- 1. Tepok telung nung shilem ka -7
- 2. Tamajung aküm -5
- 3. Chi den külemi achiba -3
- 4. Meimchir alimai aruba -3
- 6. Laishiba nung ayong ka -4
- 9. Tarutsü nükla -7
- 10. Tamendakdak/Nükjidong -4
- 11. Tenük-telen mejungi aküm -5
- 13. Terok nungi adokba -3
- 14. Meimchir telemsa -3

OLONG PAITEP # 6537 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer, 13. Sen,
- 15. Kioktsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüktsü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.



Agüja
aliba
noksa
nung



meputepi
aliba 7
bushiang

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Congress MLA aser TMC züngsemtemi süngdongzüng kübok lungkak ait



(Abelen nungi) Assam Congress MLA Kamalakhya Dey Purkayastha aser All India Trinamool Congress (AITC) indang Assam State Unit züngsemtem angur.

Guwahati, June 6, 2023(Agencies): Assam Speaker Biswajit Daimari-i electricity jenjang atuba indang olen ka jembiba anema Congress MLA Kamalakhya Dey Purkayastha-i Biswajit Daimari'er kima jakdang süngdongzüng ka nung mener lungkak ait.

MLA Kamalakhya-i electricity aangtsü atema iba mapa ya inyaka sayu.

Assam kübok tesem ajungalen kanga tsüka akümba aser power bills teimba akümba mapang ka June 5 nü Assam Speaker Biswajit Daimary-i nübortem dang süngdongzüng nung amentsü ayongzuka liasü.

"State indang electricity production maliba ajanga tanga state tem nungi electricity bener arur. Anungji asenoki power bills ajema arutsü atema süngdongzüng kübok kazütsüla. Iba inyakyim ajanga power bills ajema akümtsü" ta Speaker Daimary-i ashi.

Assam nung alirtemi pei libaliro melenshiogo aser alima den tesentaktep mali kümogo ta World Environment Day nung Assam Speaker-i metetdaksü. Nisung kati süngdongtem wazüka meyetetra pa dak iba süngdong atsüngtsü temeten mali. Guwahati nung pollution ajema akümtsü atema nübortemi plastic amshiba anentsüla, ta paisa ashi.

Külen, state BJP president Bhabesh Kalita-ia kechisarena nung aser power bills nung jenjang atuba ya supply aser demand ajanga lir ta ashi.

"2014 küm India nütsüng yongsük aser tanü medemdangra kanga inlokogo" ta Bhabesh Kalita-i ashi.

Külen, All India Trinamool Congress (AITC) indang State Unit-ia June 6 nü Khanapara, Guwahati nung party head office anasa lungkak aitogo.

TMC züngsemtemi tatsük nungi kümzüka alitsü atema süngdong tulu ka kübok adenshi

asere parnoki electricity bills teimba agütsüba nungi kümzüker ta ashi.

Assam Assembly Speaker Biswajit Daimary-i power bills ajema akümtsü atema süngdongzüng nung amentsüla ta ashiba State TMC president Ripun Bora-i aitsü.

"Assam nung BJP sorkar aser Power minister-i public timtem atema mebilermer. Sorkari nübortem nem tang nüngdakba magütsüba ajanga Assam nung alirtem timtemer. BJP sorkari electricity supply mesüra water supply maparen shitak meinyaker. State sorkari electricity tariffs ajemtsüla" ta Ripun Bora-isa ashi.

Tanü TMC züngsemtemisa "Stop betraying people with false promises in the election", "Stop load shedding, provide 24*7 electricity", "Go back BJP Govt", "Stop looting the public in the name of Smart meter" yimiyimtem ayima lungkak ait

Arunachal Pradesh police-i Dhemaji nung injang khaloktsür 5 apu

Itanagar, June 6, 2023 (Agencies): Assam kübok Dhemaji district nung injang khaloktsüba dak sendakba nung Arunachal Pradesh police-i nisung pungu puogo.

Iba osang ya Arunachal Pradesh chief minister Pema Khandu aser Assam director general of police (DGP) GP Singh nati metetdaksü.

"Tang tashi nung nisung pungu puogo. Yasüng parnok asem apu aser tanep ano ana apu" ta CM Khandu-i ashi.

"Dhemaji district kübok Panbari nung injang khaloktsüba ya arrtsü mangatettep indang masü. Iba ya tai tonglokja alirtem aser yirurtem tsüngda mangatettep atema liasü" ta Arunachal Pradesh chief minister-isa ashi.

"Par punguprong Likabali police station nung puoka lir" ta police spokesperson Rohit Rajbir Singh-i ashi.

Nisung pungu ya Bagam Tasso, Igip Tasso, Mikjom Tasso, Bompar Tasso aser Yongam Nguba nung ta jangjaogo. Police-i iba mapang amshiba prangpong bushitepdar aser kuli tejangja metettsü atema maneni asüngdangya südar" police spokesperson Rohit-isa ashi.

Arunachal Pradesh aser Assam arrtsü anasa nisung kari nisung pezü dak injang khaloktsü. Parnok ya Assam tsütsü süngdong tema alidang lendong atalok.

Iba lendong nung nisung ana- Boga Chutia aser Monitu Gogoi na kaset aser Jagat

Gogoi o Puspa Gogoi na yirua lir.

"Temeten angutsüla aser aibelenertem ozüng tapet agi merenshitsü. Iba mapa inyaktertem memerenshii metoktsütsü" ta CM Pema Khandu-i ashi.

Arunachal Pradesh police-i Assam police nem nisung pungu agütsütsü ta Assam director general of police (DGP) GP Singh-ia ashi.

Iba tatalokba atema Assam police-i Gogamukh police station nung Arms Act indang ken o ka benoka lir.

Assam sorkari tasür kibong shia nem Rs 5 lakh teyari agütsütsü osang metetdaksüogo. Külen, yirua alir nisung ana nem Rs 1 lakh agütsütsü.

Assam Rifles-i Kuki-Chin National Army pusemer 3 apu

Aizawl, June 6, 2023 (Agencies): Assam Rifles aser Mizoram police-i nisung asem apu aser parnok ket nung injang aika bena aliba angu.

Bangladesh arrtsü anasa aliba Lawngtlai district nung par asem apu ta AR ketdangsur kati ashi.

Bangladesh kübok Chittagong Hill Tracts (CHT) nung kanga bulua inyakba Kuki-

Chin National Army (KCNA) züngsem kari injang bener arrtsü adena aruogo ta osang angazükba sülen sepaitemi parnok mendanga ata ta Assam Rifles PRO-i ashi.

"Deobarnü par asem ket nung 5.56 mm 1,008 rounds, 9mm 2 rounds aser UBGL40/46 mm o 38 spl ammunition round kaka bena lia apu" ta paisa ashi.

Par asem ya Joseph

Lalnuntluang (48), Vanrothawna (58) aser Dabibadah (75) nung ta jangjaogo aser parnok ajak ya Lawngtlai district kübok Parva nung lir.

Par asem ya KCNA pusemertem ta temulung melembilermer aser parnoki Hmambu mesüra Bultlang nung KCNA telungpur ket nung injang agütsütsüba liasü ta AR PRO-isa metetdaksü.

**GOVERNMENT OF NAGALAND
DIRECTORATE OF TECHNICAL EDUCATION
NAGALAND, KOHIMA
NOTIFICATION**

NO. DTE/ ESTT-2/02/2023-24/ This is to inform all the NSEE-2023 appeared candidates that the Merit list has been declared and uploaded in the Department Website: www.dtenagaland.org.in, the same can be also seen from the Office Notice Board.

Also, due to the low number of submission of Class-12 Marksheets and at the request of candidates, the last date has been extended upto 16th June 2023, 5:00 pm.

**(Er. Vipulhou Lhoungu)
Director**

**GOVERNMENT OF NAGALAND
DIRECTORATE OF INFORMATION & PUBLIC RELATIONS
IPR CITADEL, NEW CAPITAL COMPLEX
NAGALAND: KOHIMA**

No.DIPR/ Post-Clr/Advt/1/2023 Dated Kohima, the 6th June 2023

NOTIFICATION

Incontinuation to the Notification No.DIPR/Post-Clr/Advt/1/2023Dated Kohima the 5th June 2023 and in pursuance to the decision of Departmental Recruitment Board for recruitment of Driver posts, a Sub Committee has been constituted. This Committee is entrusted to conduct the practical test on 8th June 2023, from 9:00 a.m onwards. Subsequently all the short listed candidates will be called for interview by the Departmental Recruitment Board on 9th June 2023 at 11:00 a.m at Directorate of Information & Public Relations, Nagaland:Kohima.

**(DZÜVINUO THEÜNUO)
Director
Information & Public Relations
Nagaland : Kohima**

**Tsürabur Suzunükshi Ozüküm
(Mongsenyimti)
Küm Noklang Ka (100 years) abensaba
tepela lemsateper**



Tanü 7th June 2023 anogo nung na kümsük Noklang Ka abensadaksüba asoshi Teyanglur Tsüngrem tenüng asanger.

"Shibai tematiba jenokdak alir, pai ajak takoksang akümbok nung alitsü."

Ayongküm nung atemba süngdong medem nü shisatsü tanü tashi onok asoshi kanga senti lir. Tanü iba anogo nung onoki nü nem akhüm tulu agütsür.

Jala, Jabasotem aser Semchirseemnur ajaki Tsürabur ano arishi talang lia ozü akhümdong südakjang ni ta Yihova Tsüngrem dang sarasademtsür.

LOST NOTICE

I, **Mr. Tatonginba Pongener**, am applying for duplicate copy of HSSLC Admit Card as I have lost it.
Father's Name : L Nokdang Pongener Stream : Commerce
Roll Number : 233811160 DoB : 30-03-2005
Institution : S.D. Jain Hr. Sec. School, Dimapur.

Iran indang mezüngbuba hypersonic missile sayaogo

Tehran, Aami/June 06 (Agencies): Iran-i parnok indang mezüngbuba hypersonic missile sayaogo, aser ashiba agi, iba yagi missile defence system tem ateta otettsü aser iba ajanga Iran nem tashi talila ka agütsütsü. Iba missile ya 'Fattah' ta nüngja agütsüogo.

State media-i Mongolbarnü iba missile sayaba sentong indang noksatem lemsatepa liasü, kong tir Ebrahim Raisi aser Islamic Revolutionary Guard Corps (IRGC) commander tem den linük nung yangluba missile tanak ka sayuogo.

State media-i ashiba agi, iba missile indang speed ya Mach 15 (5,145 metres or 16,880 feet per second) tashi asütsü aser 1,400km (870 miles) tashi yima otettsü. Maneni iba missile nung

moveable secondary nozzle ka keta lir aser anishitetsü atema solid propellants keta lir.

Osang ajanga ashiba agi, Linük lenir Ayatollah Ali Khamenei-i iba missile indang nüngja shima liasü, koba tetezü "the opener" lir.

Hypersonic missile tem ya sound indang speed dang nungi ponguben agi tekaraba aoer aser anishiteter, iba ajanga defence systems aser radar temi pozüksü tasak asür.

United States, Russia, China aser North Korea nungeri dang hypersonic missiles ya takok ngua tendanger alitsü ta amanger, ajisüaka iba hadir indang osang tejangja memeteti lir.

IRGC aerospace tekolakba Amir Ali Hajizadeh-i taoba

November ita hypersonic missile ka yangluba indang osang agüja liasü. Iba osang ya Hassan Tehrani Moghaddam asüba anogo bilemteta amungba anogo sangdonga liasü, shiba dang father of Iranian missile technology ta ajar.

Anüolen aliba linüktem aser Israel-i, Iran indang missile programme ashishia aruogo aser ashiba agi, linük indang ballistic missiles tem ya nuclear warheads abentsü asoshi amshitsü akok, koba Tehran-i magizük arudar.

IRGC-i taoba ita ballistic missile tasen ka (range 2,000km) tendangogo koba anüolen aliba linüktemi aitsüogo aser France-i ashiba agi, iba ya United Nations bangzüng nung aibelenba ka lir.



Haiti linük nung aliba Port-au-Prince nung tzunglu kanga sashia aruba sülen tetsür ka tzü agi mubanga aliba lenmang ka nung jaja aoba noksa nung angur. Tzunglu kanga sashia aruba ajanga Port-au-Prince nung tzümet süng tesashi adoka yimtung ayong akum, nüburtem taolen mali akum aser nisung aliba ki tzü agi metsüngbanga lir.

Afghanistan nung provincial governor ka pokseta südaktsü

Kabul, Aami/June 6 (Agencies): Northeastern Afghanistan province ka indang acting governor ka gari nung bomb inoker arua ketdangsürtemi metetdaksü. Iba amala mesükba lendong ka nung police tekolakba tepsetba sülen ita ka shir lir tang iba lendong atalokogo. Police tekolakba tepsetba ya ISIL (ISIS) den sendaktepa aliba telok kati nangzükogo.

Badakhshan province yimtiba Faizabad nung province indang acting governor Nisar Ahmad Ahmadi mena aliba gari nung bomb sünga inoker aliba gari kati arua atsük aser bomb pokdakja pa tepsetogo.

Iba lendong nung gari ania alisanga asü aser tangar nisung trok tashi yirua liasü.

Iba bomb ya shirnoki pokdaktsü aji mejangja, koba hopta ishika tsüngda Afghanistan nung Taliban ketdangsür ka amakba mezüngbuba liasü.

Province nung culture and information tekolakba

Muazuddin Ahmadi-i ashiba agi, Angh dak rangloker bomb pokdakja liasü.

2021 küm August ita Taliban-i sorkar atsüngba sülen linük nung security jenjang tajungba kümogo, ajisüaka ISIL puri maneni amokmerener. US-i aniba bendanger sepaitem den raraba mapang Taliban sepai meyrejang aika tepsetogo.

Iba province indang police tekolakba-a pei taküm bendanga agüja bomb bener arur pokdaksür kati tepset, koba ISIL-i nangzükogo.

Kasa mapang nung taoba küm April ita mining department tekolakba dena bomb amshia amakba mapang poksetogo.

ISIL ya linük nung Taliban atema tetsükdaksü tulutiba lir. Parnoki bendanger aser minority Hazara pur densema nisung aika tepsetogo aser yirutsüogo.

Iba telok yagi Taliban ketdangsürtem maka arudar aser March ita Balkh province Angh indang office maka pa tepsetba dena nangzükogo.



West Bank kübok Ramallah yimti nung aliba Palestine Medical Complex tonga aruba sülen Ramallah governor Laila Ghannam-i (tekolak sü temesüng agi meyrir alila) Palestine nunger arishi küm ana ser tesimal Mohammed al-Tamimi tasümg amer aliba noksa nung angur. Al-Tamimi dak taoba hopta occupied West Bank nung Israel sepaitemi injang agi akha aser Hombarnü asü.

Nagaland Wushu Association-i selection trial ayonger

Kohima, Aami/June 6 (TYO): Nagaland Wushu Association-i ayongzüka June 13 (Mongolbarnü) IG Stadium Kohima nung selection trail ka agitsü.

Taruba 32buba Senior National Wushu Championship 2023 atema asayar tajungtiba shimtetsü atema iba selection trail ayongzüko. Senior National Wushu Championship ya Pune nung June 26 nungi July 1 nü tashi asayatsü.

NWA-isa selection trail ya tebur 48kg, 52kg, 56kg, 60kg, 65kg, 70kg, 75kg, 80kg, 85kg,

90kg. 90+kg category aser tetsür 45kg, 48kg, 52kg, 56kg, 60kg, 65kg, 70kg, 75kg for category atema agitsü ta metetdaksüogo.

Selection agiba sülen category ajak nungi tajungtibatem dang iba asayamung nung shilem agitsü atema shimtsü ta kasa sangdong ajanga metetdaksü.

Association-i ashiba agi, National championship nung gold medal angurtem National Games 2023 atema qualify süatoktsü, koba October ita tatembangbuba hopta aser November ita mezüngbuba

hopta Goa nung asayatsü lir. Iba dak sendakba nung züngoksema aliba unit ajak dang selection trail atema asayartem renemshitsütsü metetdaksüogo. Asayartem indang list ya Nagaland Wushu Association office-i tsüngtong arua agütsütetsü aji mesüra item number 9863238620/9916580774 ajanga June 12 nü tashi nung whatsapp sütetsü. Osang tejangjaba agitsü atema NWA ketdangsürtem den tongteprateptsü asoshi kasa sangdong ajangsa metetdaksüogo.



India captain Rohit Sharma aser Australia captain Pat Cummins na World Test Cricket Championship final masaya tsüngda tangokba noksa nung angur.

1buba Inter-College Basketball Championship ayonger

Dimapur, Aami/June 6 (TYO): 1buba Inter-College Basketball Championship (tebur aser tetsür) June 14 nungi 16 tashi JV Rise Foundation Basketball Court, Signal Angami, Dimapur nung asayatsü. Iba asayamung atema June 17 nü reserve day ama mekazüka yuogo.

Iba asayamung ya Dimapur District Basketball Association (DDBA) den longjemer Department of Youth Resources and Sports, Government of

Nagaland-i ayongzüka lir.

Iba asayamung nung Nagaland University aser Nagaland nung amendaker aliba autonomous university tem kübok aliba college ajaki shilem agitetsü.

Asayamung atema tenüng züngoksemtsü asoshi tatembangbuba anogoji June 12, 2023 (3:00pm sharp) asütsü. Asayamung atema fixture ya June 13 nü sayatsü. Asayatem timba light tsükloker asayatsü.

Takok angurtem nem senpet yamai agütsütsü

(tebur aser tetsür):

- Winner - Rs. 40,000
- Runner-up - Rs. 25,000
- Joint 3rd Place - Rs. 10,000 each
- MVP - Rs. 3,000 each

Asayamung dak sendakba nung osang tejangjaba agitsü atema item number; 7085994276/7005727663 nung tongteprateptsü asoshi Dimapur District Basketball Association tir Sentiningsang Longkumer-i metetdaksüogo.

Karim Benzema Al Ittihad nung denogo

Aami/June 6, 2023 (Agencies): Karim Benzema-i Al Ittihad den tenangzüktepba ka yangluogo aser pa iba Saudi Pro League club nung free agent ka ama oa adentsü renemer lir.

Transfer expert Fabrizio Romano-i ashiba agi, Benzema-i contract dak sendakba nung kuli kaket ajak nung sign süogo aser pa iba club nungi 2025 küm tashi asayatsü. Iba den ano küm ka talila asayatsü asoshi lenmang sadema lapoka yuogo. Real Madrid den tenangzüktepba yangluba nung one-year extension clause activate

asüba sülen pa summer window nung free agent ka kümogo. Benzema-i club toktsüba atema Madrid coach Carlo Ancelotti mepelar amai ajisüaka ashiba agi, pai kechi telemtetba agiogo aji akümtsübuttsü nüngdaker.

Karim Benzema Real Madrid nungi küm 14 tashi asayaogo. Pai iba club nungi asayaba mapang takok marnok 25 kokogo. Benzema-isa taoba küm Ballon d'Or agizüka liasü. Taoba küm pai kanga junga asaya Madrid-i La Liga aser Champions League akokba nung teyari tulu agüja liasü. Pa Real nungi

tatembangbuba season nungbo yiruba ajanga junga masayateti liasü aser iba ajanga pa taoba küm December ita Qatar World Cup nunga shilem magitet. Ajisüaka Benzema-i La Liga aser Champions League nung asaya 33 nung asaya aser goal 23 idakja liasü.

Kasa mapang nung club nem teyari tulu agütsüba atema Real Madrid-i sangdong ka ajanga pa dang kanga pelaba lemsatepa liasü.

Al Ittihad shirnoki Karim Benzema alizükogo, parnoki Cristiano Ronaldo asayaba club Al Nassr ajateta Saudi Pro League kokogo.



Tamil Nadu Chief Minister MK Stalin aser Chennai Super Kings kibur Rupa Gurunath aser N. Srinivasan nung IPL 2023 trophy bener tangokba noksa nung angur. T.N. Sports Minister Udhayanidhi Stalin-a noksa nung angur.

Josh Hazlewood WTC final nung masayatetsü

Aami/June 6, 2023

(Agencies): India den Australia team renemshiba mapang fast bowler Josh Hazlewood yiruba ajanga iba asaya nung masayatetsüsa kümogo. Pa Indian Premier League (IPL) nung asayaba mapang yirua liasü.

Kang dang yonga aliba WTC final ya Oval June 7 nungi 11 tashi asayatsü.

Hazlewood tia maka yiruba ajanga masayatetsüsa akümba sülen Australia-i fast bowler Michael Nesar team nung züngoksemogo. England den Ashes series asayatsü aliba dak rangloker Hazlewood kanga mapang talila agütsüogo.

Nesar-i taküm Glamorgan nungi County Championship nung kanga junga asayaba sülen pa team nung aniokogo.

"Josh asayadaksütetsü koka lir ajisüaka taruba asayamung temulung dang yur iba telemtetba agiogo," ta Selectors rongnung mendenbuba George Bailey-i

ashi.

Nesar-i tawa kanga junga asaya arudar aser pai taoba asaya asem nung wicket 14 agiogo, kong Yorkshire den asayaba mapang wicket 7 agiba densema lir. Pa taoba mapang Australia team nungi test asaya ana nung asayaogo aser iba mapang pai wicket 7 agia liasü. Ajisüaka Hazlewood masayatetba mapang ka nung fast medium bowler Scott Boland-a team nung anioka asayadaksütsü akok, kechiyong nung England indang condition nung pa asayadaksüba tajungba asütsü ta bilemer.

England nung Ashes series ya June 16 nü tenzüksü aser iba ajanga Hazlewood nem pa temang taneptsü tajungba ngur atatsü atema mapang peria agütsütsü, shiba Australia team nungi test aika nung shilem magiteti arudar.

Hazlewood ya tawa tembangba IPL nung Royal Challengers Bangalore nungi asayaba mpang yiru. Iba asayamung nung pa asaya asem nung dang asaya aser iba sülen kidangi meyipa ao.

Eden Hazard-i Real Madrid toktsütsü

New Delhi, Aami/June 6

(Agencies): Real Madrid-i sangdong ka ajanga iba season tembangba sülen Eden Hazard-i club toktsütsü ta metetdaksüogo.

Telok anapronglai pa den tenangzüktepba yanglur aliba küm ka anunga lia iba tenangzüktepba raksatsü asoshi mulungtepogo, ta kasa Madrid-i sangdong ajangasa metetdaksü.

Chelsea nungi La Liga-i aruba sülen Hazard ya küm pezü junga masayateti aruogo, kechiyong pa yiruba ajanga mapangshia timtem agütsüba den Santiago Bernabeu nung junga tiptema melitet.

Pa ya Real puti otsü nung sen timtiba agi alizükba asaya süaka, arishi küm 32 tain Hazard-i imlaba ama junga

masayatet aser tetsükdaksü aika liasü.

Hazard shiba tang asaya aliba season nung league asaya trok aser tetoktepba ajak senteper 10 ben asayaogo, pai Real nungi asayaba mapang takok marok ti benokogo, kong Champions League aser league title ana densema lir.

"Real Madrid C. F. aser Eden Hazard na tangatettep ka dangi aruogo aser asayar ya June 30, 2023 nü nungi club nung shilem magitsü," ta club sangdong ajanga metetdaksü.

"Real Madrid-i Eden Hazard dang kanga pelar aser pa aser par kibong tarutsü tajungba ka asoshi imlaja atar."

Real pur iba season nung tatemsa Athletic Club den Deobarnü asayatsü lir.

BILEMDANGANG
 "Na anema sakra nü wadang ano metembang ta metetang. "